



BOSNIA AND HERZEGOVINA
INSTITUTE OF METROLOGY
OF BOSNIA AND HERZEGOVINA

Broj: 06-46-1-970-1/2015-AN
Sarajevo, 13.08.2015. godine

Na osnovu člana 4. i 21. Zakona o mjeriteljstvu Bosne i Hercegovine ("Službeni glasnik BiH" broj 19/01), člana 9. Zakona o osnivanju Instituta za mjeriteljstvo Bosne i Hercegovine ("Službeni glasnik BiH" broj 43/04), te člana 61. st. 2. Zakona o upravi ("Službeni glasnik BiH" broj 32/02 i 102/09), a sukladno odredbama člana 11. i 12. Pravilnika o ispitivanju i odobrenju tipa („Službeni glasnik BiH“ broj 67/12), direktor Instituta za mjeriteljstvo Bosne i Hercegovine donosi sljedeću:

ODLUKU

o izuzeću od procedure provođenja tipskog ispitivanja i izdavanja certifikata o odobrenju tipa za vage za građevinarstvo koje su u upotrebi

Član 1.

Ovom odlukom uređuje se i definiše izuzeće od procedure provođenja tipskog ispitivanja i izdavanja certifikata o odobrenju tipa prema Pravilniku o ispitivanju i odobrenju tipa („Službeni glasnik BiH“ broj 67/12) a za vage za građevinarstvo koje su u upotrebi i koje u proteklom periodu nisu bile predmetom odgovarajućeg pregleda niti su na propisan način pregledavane, a ne posjeduju tipsko odobrenje izdato od strane Instituta za mjeriteljstvo BiH (u daljnjem tekstu: Institut), definisano kao obavezno prije pristupanja verifikacijama istih, a na osnovu člana 1., stav 3., Naredbe o mjerilima u zakonskom mjeriteljstvu i rokovima verifikacije („Službeni glasnik BiH“ broj 67/12).

Član 2.

U slučajevima iz prethodnog člana ove odluke, a radi retroaktivnog provođenja postupka i razmatranja zahtjeva za tipsko odobrenje od strane korisnika mjerila, neophodno je dostaviti slijedeću dokumentaciju:

- Istorijat vage-dokumente vezane za vrijeme kada je izvršena nabavka i instalacija vage. Istorija korištenja i verifikovanja vage od strane imenovanih laboratorija u proteklom periodu predstavlja dokaz o starosti i upotrebi vaga, te je osnova za provođenje ovog postupka, koji odstupa od regularne propisane procedure (vage koje su instalirane i u upotrebi su prije 01.09.2012. godine, kada je stupila na snagu Naredba o mjerilima u Zakonskom mjeriteljstvu i rokovima verifikacije – „Službeni glasnik BiH broj 67/12).
- Rješenje o odobrenju tipa sa priložima od nacionalne mjeriteljske institucije zemlje proizvođača ili nacionalne mjeriteljske institucije jedne od zemalja Evropske Unije, odnosno od prijavljenog tijela (Notified Body) za pokazne uređaje (indikatore) i mjerne ćelije, ili računarsku jedinicu sa odgovarajućim softverom koji u potpunosti zamjenjuje pokazni uređaj, ili OIML certifikat o usklađenosti za pokazne uređaje i mjerne ćelije sa eventualnim izvještajima o ispitivanju za mjerne ćelije;
- Ukoliko su vage izvedene sa računarskom jedinicom, uz takve vage mora biti obezbjeđena kontrolna vaga (odobrena i verifikovana) prilikom ispitivanja tipa i svake verifikacije (prve i narednih)



- Dodatno se mogu obezbjediti izvještaji o ispitivanju od nacionalne mjeriteljske institucije zemlje proizvođača ili nacionalne mjeriteljske institucije jedne od zemalja Evropske Unije sa prikazom stvarnih vrijednosti u odnosu na maksimalnu dozvoljenu grešku propisanu prema zahtjevima odgovarajuće Međunarodne preporuke OIML ili odgovarajućeg međunarodnog standarda (za pokazne uređaje i mjerne ćelije);
- Crteže sklopova i dodatnih elemenata u sklopu instalacija vaga ili dokumentovane slike sa izvedbama ovih vaga na terenu;
- Mjeriteljske karakteristike za svaku od vaga, npr. u slučaju zasebnih vaga za aditiv, cement, agregat i frakciju.

Član 3.

U zahtjevu za tipsko odobrenje za vage za građevinarstvo koje su u upotrebi, a za koje je moguće izdati tipsko odobrenje od strane Instituta po skraćenom postupku, moraju se navesti serijski brojevi za iste koje se nalaze na terenu, te podaci o svakoj vagi posebno.

Član 4.

Za svaku vagu za građevinarstvo koja se verifikuje dugi niz godina, a ne posjeduje tipsko odobrenje izdato od strane ovog Instituta, a koja je odobrena na način naveden u prethodnom tekstu, mora se izvršiti prva verifikacija od strane laboratorije za verifikaciju u okviru Instituta ili u zavisnosti od maksimalnog kapaciteta vage. Prvu verifikaciju može obaviti i druga imenovana laboratorija uz nazočnost jednog od službenika Instituta.

Član 5.

Zahtjev za tipsko odobrenje za vage za građevinarstvo po skraćenom postupku može podnijeti samo krajnji korisnik.

U slučaju iz stava 1. ovog člana, vlasnik izdatog Certifikata o tipskom odobrenju će biti vlasnik mjerila, dok će period važenja istog biti tri godine.

Na certifikatu o odobrenju tipa će biti naznačeni striktno serijski brojevi vage u okviru naznačenog tipa vage za građevinarstvo.

Član 6.

Ukoliko korisnik mjerila nije u stanju obezbjediti gore navedene dokumente, ili su dokumenti nepotpuni zahtjev istog će se odbaciti kao neosnovan.

Član 7.

Ova odluka stupa na snagu danom donošenja i ista će se objaviti na web stranici Instituta i oglasnoj ploči.

